

鹿
裘
石
室
集

鹿裘石室集卷第七

宣城梅鼎祚禹金著

詩

七言古

九華山歌答郭池州汝張

我聞三名山作鎮東南天黃山白嶽中鉤連九
華祀典雖不及圖經往往相後先昔我白嶽叩
天門黃山遺鼎拜軒轅眼底九華亦不惡卧遊
十載徒攀援九華但稱九子峰九十九峰一一

天帝封鴻濛半割元氣裂當空秀出千芙蓉峰
峰可望不可卽霏紅翕翠羅心胸其上嶽崑崙
崑崙吁嘻乎危哉絕飛鳥其下鉉礪矧矧逆湍轉
谷雲容容六龍回白日天鷄啼紫烟豐隆先以
伐鼓列缺後而施鞭雄風兮颭沓雌蜺兮連卷
金支翠旗光閃倏瓊臺玉宇隱隱擢其顛根盤
重淵不見底倒影去地四萬里巨鼇戴之簪恐
折翻身簸蕩滄江水怒濤散作三汲七布流珠
跳絲織疑鮫市直窺明月忽如練倘映餘霞俄

似綺洩奇挾祕真宰愁三芝八桂紛纏糾安得
僊人九節杖採藥題詩在上頭郭侯剖竹臨秋
浦九華靈區君地主李白五言何寂寥還攜謝
朓驚人語傳書約我登九華開緘口吻生烟霞
借君夾轂雙馴鹿東騎來訪上清家已覺魂飛
五溪道風盤霧磴俱了了不問九十九峰何者
好與君一歲一峰拾瑤草

采石太白樓醉後放歌別史侯仲弢

君不見李謫仙高樓百尺與天連百尺長江流

萬里一坏之土寄江邊下苦白日不到地上看
酒星猶在天史侯作宦來江左登樓有詩題向
我使我豁然肝膽開其餘諸子俱瑣瑣今者史
侯朝 帝京重攜此地送將行將行不行把我
手玉壺美酒爲君傾酒半寒生停白羽炎天颯
颯交風雨還愁山鬼照然犀更遣馮夷來伐鼓
怒濤洶湧樓勢危濕雲黯慘山低垂須臾月出
波平面恍忽一鏡涵脩眉李白當年清興發投
身俯拾江心月復道騎鯨飛上天何爲荒草埋

僊骨舉酒對月酌史侯疎狂似予白也流布衣
往往干明主西笑長安不得遊紛紛肉食真堪
鄙史侯差可托知己男兒生歿惟片言寸心可
以照秋水送君君入承明廬敬亭予歸守舊區
龍興蠓屈各有意漁海樵山恣所如醉後相看
雙眼碧破浪乘風辭采石它年擊楫渡中流試
向江邊問李白

城東酌酒送閔二還始新

城東九月霜已飛謝公樓上送將歸四海誰人

是知己五湖無處著漁磯爲君割炙且行酒小
女當筵小垂手于今貧士半失職顛顛坎軻何
不有君有兩兒俱早婚室中萊婦久不存老去
一身輕綴宅彈來長鋏斷侯門秋山蒼蒼秋草
歿客路西風射馬耳卜居好卧敬亭雲還家莫
戀新安水

爾曹行貽台輩

爾曹但飲且莫歌清商忼慨柰爾何城頭木葉
颯欲脫洞庭微風秋始波人生墮地號男子跼

踏安能轅下死吾家兩生生絕奇汗血居然勢
千里前年獻策不見收今年再作龍門游桃花
浪高三十丈張髻鼓鬣空悠悠向君行泣更坐
笑鬚髮漸長余豈少阿兄神鋒亦太雋癡叔談
言入微妙懷有白璧足不存囊無黃金舌可捫
舊客如雲散如水何人說著信陵恩我歌偏側
復偏側相看壯士無顏色屣履到門刺滿車如
此虛名竟何益醉君酒進君食胸中壘塊故須
澆口底雌黃更誰得君不見九萬扶搖六月息

邢金吾篇

邢金吾少年膽氣何豪麤學書纔足記名姓褒
衣博帶非真儒脫身羽林事天子提騎親提
繞殿趨長虹驕迫鐵如意雙鶴迸落金僕姑隴
西材高數不偶五湖扁舟入吾手田彼南山落
爲其家本西秦擊其缶博徒俠客半在門誰人
不感孟嘗恩五夜上宮陳翠袖千日中山倒玉
尊憶昔招予長千里雨花臺上秋如水王謝風
流近眼前高座道人呼不起是時君有好男兒

絳帳追隨予舊師童烏頭玄方毀齒匡鼎譚詩
能解頤廼者君年稱六十初筵秩秩賓朋集四
照瑤花傍座開一行瓊樹當庭立邢金吾刺劒
猿公君自許其術可以遂冲舉我欲令飛廉清
道蒼龍御車逝西去白雲出山際王母顧見汝
汝在崦嵫平圃間膏玉燭銀還寄予

周國雍出守宕渠七夕經采石太白樓讀
余詩題書見示廣安有故宣令姜君台
聞已仙化兼問之

楊子江頭濤欲語江楓颯颯催行旅使君飛渡
金陵來停舟弔古登牛渚余昨題詩太白樓乘
風一醉過瓜州聞君三讀三嘆息何由正始垂
千秋一尺書傳姑孰使使者殷勤致君意是夕
七夕秋蒼涼却望天河超天駟駟馬加君一馬
行嘉陵江水轉澄清文章已見稱雄似治行還
高化蜀名宣城舊令姜太伯采真歸作峨眉客
帝遣玉棺垂其堂恍惚雙鳬輕一擲君有仙骨
君不知分符亦復近峨眉肆中試覓當時約或

化青羊未可期

流波館送吳翁晉還吳興

秦淮波綠木葉黃華館豁達來風涼主人張筵
歌送客座間宛轉流清商自昔絲桐潤人耳忽
怪歌聲咽欲死滿座惜別不成歡興盡東歸吳
季子若翁開府大中丞先後吾翁相代興猶憶
兩家全盛日少年輿馬氣馮陵世事滄桑如轉
轂高門翻作窮途哭羽林那復念孤兒濁水居
然吟獨祿解后長安八月秋與君上策斥不收

二毛已見凋青鬢幾載空教敝黑裘桃葉來尋
官渡口十五胡姬親壓酒六代豪華在眼前麇
麇不是靈和柳君歸乎君歸乎蒼弁清苕帶五
湖茶笋從知堪自給草茅豈必無良圖予且將
歸敬亭路雲鳥微茫隔烟霧布帆百尺抗西風
長天一望青山暮噫嘻男兒各有身虛名何物
能驅人讀書萬卷亦良苦但覓當時漉酒巾

徐家盈盈樓送方嗣宗歸陳州別業

秋聲絳繚上客衣江頭日日送將歸白門楊柳

攀且盡黃雲不動烏高飛我亦他鄉生白髮爲
道方生更明發離魂已拾梁園花愁心暫醉金
陵月金陵徐孺絕代餘二八盈盈樓上居淡妝
欲就眉能語別賦新成手自書書作香囊繫肘
後芬芳宛轉歡懷久但教肘後有香囊何必縣
金印如斗君不見自昔陳王詠洛神驚鴻空入
夢中身美酒高歌須快意知難再得是佳人又
不見豐干之社六七子汪程多病吳郎死入洛
君猶舊角巾小謝踉蹌走都市

以詩代書招屠長卿

我聞酒乃天之祿，澆君礪礪在胸曲。半酣耳熱，
斫地歌氣盡，英雄惟一哭。君才天馬驟行空，立
挾萬象開鴻濛。眉間燁燁丹霞色，腋下泱泱滄
海風。致身雲霄非不蚤，銅符再綰江南道。茂宰
頻栽赤縣花，僊郎入起明光草。妙手真修五鳳
樓，御顏常近雙螭頭。引車折節要三事，列座雄
譚傲五侯。五侯余友宋忠甫，會稽黃生名博古。
翠管俱調子夜聲，紅牙低按前溪舞。吏隱難容

金馬門角巾歸第亦君恩
漫游好逐盧敖去
秘訣新從素女論
凌秋忽渡錢塘水
苦憶平生沈太史
白馬來臨識者驚
黃鶴呼名招不起
沈太史屠先生向知生死見交情
君雖儼然復失意
砥柱雙折崑崙傾
吁嗟其人骨已朽
獨剩精光射牛斗
神物會合終有時
飛沉豈問千秋後
一城斗大宛江濱
迢遞高深結構新
謝公最解吟如練
紀叟猶能釀老春
臨水登山多忼慨
風景何殊世相代
朱顏玉露冷芙蓉
灝氣金天餐

月三ノイ三ノイノイ
沉瀟正襟誦爾廣輪篇羽翼將生拔宅仙以往
共期壺內住只今且就鑿頭眠

酬屠長卿序章臺傳奇因過新都寄汪司馬

我不解楚竹又不好秦箏驚心動魄置何所別
有肉譜縱且橫金元樂府差快意吳越新聲橫
得名少年填詞頗合作家部尚有清商樂坐轉
金星不夜城偷傳璧月臨春閣最愛章臺楊柳
枝飛絮飛花能爾奇么篇親度成珠弗隻字爭

夸是色絲此道難知復難遇世間耳食紛無數
苦少寧逢都尉增分明翻被周郎顧東海屠君
天下才把筆大叫序章臺謬許曲中和律呂忽
看指下走風雷風雷君合爲霖雨翦雪裁雲但
嫵嫵我故錚錚百鍊剛柔情化作俳優伍嗚呼
我不學梁鴻五噫歌出關君毋如子幼勞歲歌
南山卽今此傳風流更奇俠便歌對酒呼雙鬟
新都司馬亦見賞與君暫代五湖長嫵姚倘召
出禁中鼓吹還期歌塞上

採芳歌贈屠家小史

精衛恨填滄海水誓不願身爲女子但化人間
美丈夫何惜終當以情死上天曾夢黃頭郎未
數安陵與龍陽間傳小語能飛藻別有嘉名是
採芳採芳不須仍採綠不必更採東籬菊或登
若木翳春霞或倚扶桑窺早旭自昔容華難久
居只今壽命堪誰續君不見君主翁承恩獻賦
甘泉宮十二天閑皆下駟三千粉黛獸當熊一
朝出殿竟長揖文章有神身不立渡海惟邀化

鶴期臨池却笑前魚泣我知採芳汝非王母之
雙成亦非梁家之玉清函關倘御青牛去徐甲
應乘紫氣行

天寒行送泰符之金陵寄子馬

天寒以風歲云暮揚子江深客南渡此生無定
轉蓬科臨岐暫艤連枝樹惜予欽崎歷落人平
生恥與鄉里親吾家諸子差可數交結何如併
一身就中子弟梅子馬一旦攜家去白下翻卑
赤鷁戀榆枋不信玄狐哭松檟渡頭桃葉日相

招井上臙脂夜作妖花迷朱雀青絲騎月映清
淮紅板橋卜居聞近江寧縣雕牕別鑠芙蓉面
朝莫猶憐獨倚門秋風敢怨輕題扇汝行爲我
致汝兄骨肉偶合能無情白門藏烏啼欲絕桓
山離鳥悲且驚嗚呼佳人難得復易失亦道千
金那足惜請看明鏡挂高堂長繩不繫西山日

酬李水曹

少年讀書不快意長策願攄經世志雕蟲篆刻
豈壯圖遭時遇主誠難事空持傲骨向誰投縱

得虛名翻自累白璧懷來罪已深蒼精匣後光
仍閔李君往作涇川侯片言邂逅卽千秋詔主
金錢歸少府官同水部在揚州濁水青雲不相
偶白門重折官亭柳一朝鍛翮鴈南翔九月驂
驪馬東首敢謂攀援遂所親猶疑俛仰跡俱陳
張羅衆忽收窮鳥濡沫君能起涸鱗君不見三
言虎成市鑠金銷骨從茲始可憐貧賤轉畏人
何意風塵有知己嗚呼我欲君兮君不知男兒
安用七尺爲

燕臺行送王美中應貢入京

燕臺之高高突兀黃金如山買駿骨當今相者
皆舉肥誰識權奇與滅没王君才本千里駒生
沾赤汗沫流珠霜蹄蹶猶如鐵風鬣驚嘶豈
戀芻此日天閑充上駟一出駑駘俱辟易行空
終與籊乘黃伏櫪何須悲老驥銀鞍錦障錯春
雲迴立丹霄自不羣龍種由來渥洼出使君五
馬五花文

南風篇贈子馬送楊舜華歸秦淮

南風五月吹禾黍翩然結伴將歸去就中神女
冰雪膚界入清涼不知暑江程三百未爲遙一
曲秦淮舊板橋不勞兩槳來迎渡自有扁舟會
上潮石首鱖魚堆滿肆枇杷楊梅都已至家家
駐馬綠槐陰處處吹笙紅蠟淚眼前翕翠鬪霏
紅儵忽飄風苦斷蓬未卜香魂還海島且拚白
首老花叢雙行鍬臂朱絲繫何用爲郎倚夫壻
西陵松柏誓同心南浦芙蓉原竝蒂蒲水喬林
正掩扉高堂五色斑斕衣曾聞短日猶堪愛莫

逐行雲竟不歸

焦村湖舟中放歌同季方叔送徐飛卿歸

金陵

輕薄少年那足貴金陵徐孺多意氣能文寸管
有餘麾結客千金寧惜費去年上書予不收桂
殘楓老白門秋游子朝陽愁別路佳人夕宴張
高樓高樓一別頓如雨片帆忽挂雲中樹宛水
波明曼睩騰敬亭黛綠脩眉嫵臨水登山有勝
情藻落金薤徧題名餐松恍似秦宮出遺佩猶

疑漢浦行行雨行雲非所願爲恨爲驪今不見
含悲妾自採靡蕪深情君或存紈扇流波澹澹
烟霏霏趙趙風吹白苧衣青絲玉壺提美酒焦
村湖上送將歸阿翩爾歸更渡秦淮水知爾驢
年出故帑愛離不染是真如拈花試問函大士

九月八日同佺宗漢明府鄔汝翼柳陳甫

陸成叔山人謝少廉吳翁晉文學家弟
子馬集周元孚武選署中言別分賦七
言歌行得篇字時元孚以使事還楚

木下洞庭秋始波白門把菊柰霜何友生集送
置美酒酒酣拔劍爲君歌君往司農北游日曾
刺公卿事刀筆室女倚柱長嘯悲省郎襍被揚
眉出是時權力出貂璫臺瑣諸公絕早囊君纔
五日移京兆一疏千言何激昂我鼓欲擊丞卿
怒臨難全生逢聖主孤管愁聽吹入關竹書
在握行趨府十載重來粉署中畱都根本兩京
同秦淮王氣仍旁魄鍾寢靈光正鬱蔥滔滔南
國揚之水擘袪楚望鄉心起潯陽濤逼峭帆青

皖公峯落殘杯紫使節飄搖一過家倘問前期
未及瓜三荆歡倚同株樹雙鈿妝閒舊髻花今
者歲旱己在丑江南萬戶嗷嗷走傳聞金錢發
水衡飢人枵腹官飽手君不見大夫境外得自
專矯詔開倉憶昔賢采風吳楚歸朝後丹陛
詩陳雲漢篇

南歸短歌別子馬

我病子偕來我旋子暫住行止俱少娛世事誠
多故孤鴻浩南翔大江莽東注生非鹿與豕勢

可長羣聚子不聊女蛾眉間予復構他黃口妒
連枝摩葉同根株豈合憂歡托行路深愛能無
多苦心薄言猶恐或逢怒式微式微泣且歌曰
歸曰歸遲以暮風月堪淹上苑花霜露宜妨北
堂樹

新都羅子昭出淮酒飲予長橋告以將遊
其地屬爲一歌予時奔逐困窘感貧士
之意因相與傾醉援筆應之

昨經淮陰市曾沾淮陽酒走酌漂母祠韓侯今

在否凌春涉大江白門多酒肆殘花撲玉缸遊
絲絡珠轡光風汎蕙浴蘭天長板橋頭醉管絃
羅君手攜綠尊至紫泥雙印落眼前此尊攜來
桐柏水有人歌出金陵子自言復作淮上客要
余片言重行李余交往往君鄉人雨覆雲翻變
態新與君投分初頗淺詎知末路能相親君不
見黃河千里猶一曲豈必英豪常錄錄雄飛未
脫臂上鞬螭屈還甘胯下辱又不見水維漸緩
淮泗奔寧夏驕兵奔主恩寶玦珊瑚空自佩

一飯誰更哀王孫

楊娘席上畱別汪仲嘉汪景純吳載伯吳
太寧顧孝敷劉季然父質甫羅伯倫家

弟子馬

敬亭何土生足恥文脊吾家衆不理四海交親
皆弟兄片言得意卽知己我與世人無所猜世
人欲殺胡爲哉平生家讐不得報一二府主能
憐才馬首行行且隨牒乘潮暫鼓橫江楫爲覓
楊枝與柳枝苦憶桃根伴桃葉桃葉渡頭春載

陽處處看春總斷腸百種名香迷玉洞一羣嬌
鳥繞雕梁玉洞雕梁大宛媚城中少年相逐戲
太憨擲果故挑心癡如更衣翻作忌由來天府
號南都楊娘妖豔猶絕殊雖恨美酒乏平樂尚
傳清曲出吳趨我今有懷向誰道辭君北遊真
草草燕臺突兀千黃金誰信鹽車羈馱裏君見
長卿獻賦終不逢當年犢鼻成龍鍾何如餐盡
芙蓉色坐鬪眉山黛幾重

真娘墓歌

何不學僊冢纍纍白楊西郭陰風悲虎丘一叩
真娘墓薜荔援牆委蘭露千歲蒙茸幾樹花夜
飄鬼火曉啼鴉向憐挾瑟彈清月猶憶吹簫乘
絲霞吳閭少年往來道黛蛾釵燕誰能好酒滴
春雲夢不消泉聲幽咽鐘聲老陌上行游緩緩
歸昨日紅顏今是非東望闔閭穿葬處玉鳧欲
化湛盧飛

余此詩作于虎丘梅花樓王德操書之稿適張憐自海虞至持其稿

去海虞倩嚴三丈爲書一通是後吳中有含翠亭帖稱元豐壬辰米芾書考元豐紀元八年始戊午終乙丑而無壬辰逗漏可笑華亭濮之臣復作一帖吾鄉諸子多爲跋力辨之

蘭亭聚訟
益多事矣

寶網篇贈薛五靈濤

館娃沉沒西施死寶網珊瑚招不起煙霜叠換
幾千年春色吳宮照湖水湖水年年滿舊壕棠
舟桂檝各分曹無賴冶遊無數伴衆中先問薛
靈濤金陵來逐金閨客蹋遍東城轉南陌但聞
酒美莫深辭瞥見花開須早折攜手行歌上虎
丘黃梅雨霽麥初秋單衫杏子從風舉團扇桃
花映月流百媚羞陳能拓落群情善會能斟酌

調絃吮墨樂多方蹴踘彈碁歡間作更衣玉靚
鬱蘭芳絳蠟雙融赤鳳凰逸興乍濃還乍淡豐
輝時引倏時張人生容好那堪待相識相逢拚
劇愛苔文石老座空懸金氣波寒劒何在亞字
城邊楊柳津青樓粉黛競爭新安知樓上盈盈
女不是吳王宮裏人

妾命薄爲張憐賦

有序

妾命薄撰始陳思然輒自迷其指簡文而下
稍復尋源夫怨弃之詩其來凡幾終風皎雪

則移寵興悲萎非逝梁則辭房致惋尚有廬
江小吏之妻驟違阿母漢國中郎之女見偏
彊胡或如非分相干流離別偶纏綿絕望啼
笑俱難若斯之屬咸托篇章傳寫衷隱情深
文綺片語可以銷魂精感穹旻長歌可以當
哭阿憐事竝有異焉憐本娼家已適人海虞
而室有妒者又一二讎者構其間遂起大獄
所適固貧士官且以逢掖故持之急力不支
累使人辭謝憐憐姑忍以待轉徙經年無所

歸歸其家廼嘗內媿伏恨不懌也今由玉山
客婁東與相值每自稱薄命妾云余援古題
爲妾命薄贈之其亂要以顧門之期矢以共
穴之信詞誠不工意獨良厚雖然死生亦大
矣彼墜樓沉井何人哉

白團且莫詠綠綺且勿彈我歌秦樓妾命薄四
坐聞者皆辛酸妾家吳閭繞湖水日蕩波光花
上綺預羞晚嫁似盧姬作計將身托君子雖非
三十侍中郎偏能傅粉復薰香寶帳畱煙張羽

翠琰窻承月約鴉黃此生遽信歡無極嬌坐持
春駐顏色從知美器不常居翻使中衢有傾仄
不是君家婦難爲不是君心易轉移柰何不得
懷與汝由來誨妒是蛾眉單符下郡急鬼伯踉
蹌遠徙貧相迫往時父母私見迎樓頭車馬仍
南陌攝帶褰帷怯乍親滿床絲管暗凝塵詎識
含啼併含笑可道新人勝故人妾命薄妾命薄
於葉葉落歸本根妾歸倡家門妾命薄妾命薄
於雲雲行返故山妾返狹邪間狹邪舊伴鬪嬋

媚命薄身輕只自憐千里深情不唾井萬行清
淚續流泉感君初爲妾顛倒暫惜鉛華待君老
同心願結西陵松讒言畏逐南山鳥我竟此歌
歌轉哀摧藏掩抑向誰開欲問妾腸愁絕處請
君試上青陵臺

弇山園贈戚不磷追憶王長公

羊曇本知名嘗遊謝太傅馬策叩州門慟哭西
歸路我行弇園攜戚君池光石氣搖秋雲東山
聲伎良不乏每向瑯琊醉後聞眼前感激千古

事白雞夢斷青鸞逝服藥求仙徒悞人縱酒高
歌差快意戚君善畫復善詩秦樓日夕多佳期
此園自來從客賞蹠坐攀條有所思

虎丘贈吳君

新都賢多爲上客吳君獨抱南山石新都士人
懷異心吳君一見交卽深我尋舊隱來吳市君
亦浮家托湖水橫塘風柳拂波垂海湧煙花向
空起好遊兼復能好文畫圖筆陣藏殷勤團團
明月題紈扇澹澹秋雲染練裙擁書萬卷徒自

苦杜門何似君行賈一簞百結人所難莫使黃金賤如土

澹澹君所昵妓

游女行陸少府席送楚姬呂五還于湖兼

答青山社王仲修諸子

東門楊柳窄地長西陵桃李噴路光江漢之間
有游女嫣然笑解雙瓊璫忽憶南朝舊佳麗石
頭艇子初堪繫蛾寫熒熒妒轉羞燕分涎涎嬌
能殢紅橋錦牒玉壺傾秦淮姊妹爭來迎高吟
如練更如綺爲慕宣城小謝名小謝風期宛如

昨餘霞半映澄江郭感激分明千古前韶華儵
忽成蕭索阿翩阿美昔曾游選日邀歡花近樓
鴛鴦機度銀河曙翡翠牕懸寶鏡秋子年尚少
我未老相識相逢何草草目底波橫宛水明夢
中雲惑巫陽宵百里湖陰歸不遲歌殘芍藥醉
醪醑鄂君揄袂移青翰陸郎贈策乘斑騅君不
見我生游道雖日廣敝帚誰肯千金享秦川公
子傷亂離邯鄲才人嫁厮養汝歸足莫踰門樞
畫眉深淺入時無併語青山社諸子青山端合

送頭顱

孫子真與吳次魯有五嶽之盟命予作歌
傳聲山靈先爲敕駕

新都山人王仲房長遊自誇足力強每託僊踪
稱十嶽半割鴻濛歸大荒二室三峰不到眼南
衡北恒怯重趼依稀堇躡日觀顛扶桑低映蓬
萊淺後來之雋有孫卿兼饒勝具濟勝情臨池
丘壑胸中出繞席煙霞舌上生禽慶昔作尚平
友吳郎復與孫卿偶千秋但結五嶽盟大荒之

半屬烏有乘興勇達切勿疑昏嫁何能待畢時
山人久去人間世仙邪鬼邪寧可知不然請君
圖一室鳴琴衆山響應律太和太素雙登封君
家白岳是其一我曾拄杖叩天門香爐高拱玉
虛尊會心原不必在遠逍遙鸞鷟隨鵬鯢孫卿
咄謂愚豎子茲行特自五嶽始周流六氣御八
風汝不見盧敖與若士

鷺峰經席送吳翁晉歸吳興

六代風流迹盡掃四海交游人漸老相逢累醉

菊半黃把君新詩道君好却怪論詩如論色骨
氣枵然飾粉墨又如抵掌從俳優客主由來曾
不識當今用文非用詩文亦用正不用奇禹貢
稱神苦難諷儀經載鬼轉復疑薄霧輕裾未成
絮勸君衝寒且東去奇文似畏制科書新詩莫
近時流譽我方厭詩更杜文千番貝葉對爐薰
丈室歸將天女侍散空五采花繽紛舟前木脫
江一髮淥波宛轉通吳越君若憶我摩尼珠天
目山頭拾明月

支機篇爲王百穀悼亡

荆雲夢暈吳雲漠雙星啼濕秋光薄玉墀落葉
弔哀蟬冰鏡銷花隱飛鵲男子精靈解有情悼
亡一賦二毛生年年樓貯穿針影昔昔機懸弄
杼聲影苦飄搖聲斷續天河蒼涼月魂浴黃口
攀呼素髮垂辭凰并絕將雛曲蓬島金鈿信森
然姍姍步幄隔生煙只應海客乘槎去片石攜
將世外傳

清泉篇贈廣德段使君

唐書卷一百一十五
三
聞昔有泉一畝金在懷又聞有泉一酌狂失龜
陝服常畱召伯棠海溼稀逢越王石廼知山川
草樹有開非無因感化變幻實自人君不見桃
州使君廉絕倫州前濁水清粼粼聖德被地地
出寶榮光夜識金與銀西園貫朽赤流及左輔
脉破青嶙峋我歌此水代封事願烹言利老兵
召廉吏

生子吟

生子當如孫仲謀千里之駒駒驊騮嚙嚙信信

悉豚犬彼何爲者劉荊州柴桑翻被杜陵笑子
賢與愚挂懷抱我乃生瑛那得知或不及汝有
佳兒

午日江上贈繁陽趙公極

若髯如戟真丈夫扶搖終作天南圖我雖短小
亦精悍跼促今爲轅下駒多情少俠耽佳麗無
賴三尸苦畱滯安歌食酒憶朝朝藥裏書籤仍
歲歲午日扁舟夢日亭蕪江濤白赭山青縱病
似難辭一醉舉世誰能愛獨醒

聞張仲率計

焚香飲酒卽佳士去冬吾宗木華歿談諧游泳
更可人茲春張生亦復爾張生翩翩達者流比
來一旦心煩憂黃金散盡紅顏失百歲難爲七
尺謀東隣會歛操箕斗依然富壽臨皓首橫財
頑福鬼神避此事古今無不有

東門行傷妓丁金

出其東門女如林中有一女名丁金金雖作名
心不愛金可要驩情不深藹藹深情別有寄美

男少女成家計于思棄甲恐復來多毛繞涿愁
如刺每言潮不上潯陽儂亦安能婦豫章子都
莫倚將軍勢廝養終辱邯鄲娼自識娉婷坐自
惜無那阿母相煎迫有身已作百種身有客誓
辭三種客一朝違誓身不存曲閣菴菴日易昏
雉經應憐雉耿介食葵何意傷葵根霜飛六月
長城圯哀感皇天官不理君不見東門有李代
桃僵豪奴殺人倡夫死

松岡歌壽朱封公

有序

太公夙負奇節實標令聞高蹈瑞陽羽儀

聖代鳳舉千仞下斯寧于德輝鵬搏九霄息
久期于運化以爾世昭燕翼用能天挺鴻材
蚤綴朝紳筮執郡憲平允春獄庭精五覆之
規清白承家門絕四知之餽闡心模而示訓
士肅青衿望肺石而輸情人希丹籍聲騰薦
剡適三載之陟明壽秩初筵會七旬之方屆
抑且月臨長至律應初陽鸞封與青鳥齊來
山藻共海籌俱進闔郡之大夫士三老百姓

舉首加額咸以恩飯詰嗣分鈞若翁禮不忘
所自生義有起於善祝鼎祚一介忝屬門墻
厚蒙陶冶因本太公所署號松岡者命史繪
圖長歌致況夫松者公也如岡如陵不騫不
崩旣符十八大拜之祥又叶千萬無害之指
頌而非譎象而可徵則間竊取之若其偉材
質行媿古式今固有王言之綸綍在余小
子何敢與焉

喬松挺高岡偃蓋何童童華林跋其西寶蓋峙

其東下枝靄翠戲白日上枝搖碧摩蒼穹六月
寒留太古雪萬頃濤生巨海風中有人兮秉幽
潔千丈礪硯非一節長材不肯作棟梁天年自
願全巖穴由來比鳳與栖鸞鸞鳳翩翩霄漢端
涉楚尚分騷客佩入朝先著進賢冠蓮府承
歡近三載敬亭雲鳥常相待岡南岡北松陰森
柴桑故里居然在樛參拏屈態萬重翱翔雙鶴
撐虬龍丈人舊據徂徠號大夫今受天門封根
蟠顥氣超元始茯苓能白脂能紫真隱人擬朱

桃椎游仙吾慕赤松子
駭溪尺絹畫者誰丹青
幻出烟霞姿良工工意不工似持觴奉圖前致
詞君不見倥傯餐實其走及馳馬又不見貞白
慣聽笙簧在其下吾師生腹夢爲公我公龐眉
愛作社日方南至景初長六琯飛灰轉一陽心
貫四時無改色盟成三友共垂芳

壽吳母

八荒開壽域一氣轉鴻鈞
我亦解道少陵語起
居八座太夫人昔從汝州共游衍逐日爲歡地

堪選竹間置館淨娟娟棗下吹笙何纂纂是時
夫人在中廚送客足不過門樞馬有青芻客有
飯健婦猶勝一丈夫結交君家父與子左提右
挈托終始大兒文舉小德祖升堂拜母稱燕喜
歲御昭陽月載陽阿母年纔六十強倒景熹微
騰細柳蓬萊清淺映扶桑千載徽音寄帷幄却
笑神僊那可學青鳥他自來西池文鸞誰復驂
南嶽君不見虹蜺射日天四垂桂花燕啄紛離
離中天明月照四海金鏡長懸運玉儀我持彤

管光灼爍敬陳女史存丹牖
紫泥雙闕下芙蓉
斑綵盈庭歡棣萼

春情

春情春態轉飛揚
綵勝青繒試曉妝
開鏡遠山餐黛色
拂裾香艸目蘭芳
脂印回環交剗臂
狡獪時能兼劇戲
雙心相許惟一心
百歲還期常百媚
由來貧賤難爲親
除却須眉不屬身
向會箇箇推名士
今但卿卿弄婦人

月邦弟南歸出逢子馬弟詩觀我有感

子馬守官復守妓中年仍作少年戲雖云豪俠
不治生相率兒曹恐詫事海藏釋子弟月邦一
口便欲吸西江松枝嫋嫋拂談塵蓮品巍巍建
法幢憶昔金陵遊太學半臂紅綾巾折角一朝
投體向雲棲如玉美顏辭錦幄相逢艸艸在江
關乍駭頭髮對鬢斑天闕祖堂叅怖佛和寧歌
院擁嬌鬟兩人所爲判冰炭阿兄居中但讚歎
住家不及有情癡出家猶輸自度漢圓頂非禿
冠非官白蟬綠蟻時盤桓許我拍浮願已足鑽

他故紙出應難讀爾新詩偈若頌原鵲情深諷
言重吁嗟乎鷄蟲得失了無期臧穀紛紜亦奚
用

送子雲弟謁選

問道長安在日邊我亦住此曾經年但逢烏紗
能耀日不怕黃塵欲漲天人生出處各有志豈
必兄弟偕相憐鄉里金多官高誇得意祝汝好
官多得錢汝不見太倉漸罄西園積三公小靳
萬可千

送程君達游嶺南省親雷陽君達稱詩善
祿命寓金陵而游吳

囊中無錢可留看懷中有刺經滅漫祿命聊爲
日者談詩名已入詞人伴吾鄉風土惡不居破
產金陵買敝廬相府稱賓游托乘幸舍彈歌食
有魚相逢太晚別太早自言省父雷陽道抱關
猶勝作兒師薄俸差堪贍家小椰子杯深寄酒
和醉從庭下舞婆娑君才如海却賦海白日驚
雷生素波吾衰畏寒久病肺望傳奇藥出海外

廣利宮中龍女膏越井岡頭鮑姑艾廐嶺以南
多瘴雲南來消息好頻聞梅花萬樹啼么鳳夢
向羅浮一覓君

送濮忠父自儀真游宣歸華亭因憶亡友

李季宣莫廷韓

聞自真州至爲問真州事李令青蓮閣已陳董
姬翠黛妝應易君時座客擅名流隣笛山陽懷
舊游如椽巨筆扛牛鼎似練澄江繞鷺洲一曲
偶來尋宛句敬亭雲鳥高齋樹北海樽開戶盡

月牙石三集卷一
迎南宮書出人爭募醒狂不學襄陽顛清貧却
少米家船得錢或買花叢笑折券多從酒市眠
尊鱸鄉思秋風起歸覲高堂歌燕喜是龍猶憶
昔廷韓戲鴻更傳今太史

韓君陳偕令子元長應京兆舉

衢州早捷驚脫兔嚴州晚達班振鷺父子兩世
乘熊軒兒孫並駕驂鸞輅壯謀少決各時流筆
陣文鋒鬪爽秋鳳毛自合超群俊龍額從傳繼
徹侯月圓如鏡花如綺絳闕天香飄桂子名動

秦淮十四樓策先京兆三千士屏風隔座金殿
趨一泓浮碧間三湖鱗魚射鴨我代長有書肯
報侯司徒

謠體

宣之風

有序

宣之風者宣城之耆耆婦孺稱道我尹令公
者也尹公爲宣城六載再入 覲所爲善政
卽能言之士不可勝舉卽勝舉士反多矯飾
無信茲各舉其鴻且要者或爲頌或爲歌或

爲徒歌之謠或爲諺爲語皆本鄉落市井間
鼓腹而游矢口而詠出于機動于籟有不知
其所以然而然者蓋久則民志定而 上德
宣余小子聆之淢淢焉夫微生青蘋之端而
遼徹天漢之表者非風耶省方之所陳輶軒
之所采均是物也故知風之自聲色之于以
化民末矣然宣俗椎魯又雜方言余稍爲之
潤節令得比于音俾憲事者肄而導令公之
馬首以北儻 召見令公問令何以良于宣

若此此庶足備對乎末廼欲以一邑之故而
爭得天子耳目侍從之臣所謂鄙人何知
特饗其利者耳雖然固益足徵宣之風矣

七十士

一日見七十士五經紛綸百事理晏坐中堂令
則喜誰其令者尹伯子

飽官儲

虎豹之口不如飢人飽我官儲甘若飴天不我
弔令我生何以報之上天惟明明

膽立墮

片言斷獄膽立墮訟師腹枵諸吏餓一錢不入
公家課

十限糧

鷄不鳴狗不吠十限糧完吏不出禾黍芄芄鼓
逢逢百歲老翁賽社公

侍中貂

侍中珥貂緹騎虎金精一鍤無留土市爲墟民
爲虜我欲訴之逢彼怒賴我仁慈尹明府柔不

茹剛不吐昔沸鼎今安堵

大船來

大船峩珂來小船伊軋開欲開未開黃旗搖搖
江之涯黃池權使不得猜令君來合諧

群祀定

群祀既定我其維歆明德殷薦我其維馨道脉
適追肇厥文成永言克配則先正先民

有梁有梁

郭北有梁興復以耦尹公興前尹公復後郭東

有梁宛津之口樂石在左貞珉在右

駕蜚魚

斑蘭耳黃金車公與守相駕蜚魚歲德在丑二
月初阜囊白簡奉詔書我不識給事與御史
我父我母借天子

鹿裘石室集卷第八

宣城梅鼎祚禹金著

詩

五言律

出塞曲

烽火照甘泉
嫖姚事北邊
清霜厲劒鏑
初月關弓弦
驂走驄馬蒼
莽拓胡天
玉關看生入
奏凱聖人前

入塞曲

入塞馳橫吹單于蚤繫纓君恩百戰報俠氣萬人傾
無假麒麟畫誰論驃騎名但笑草玄者空勞白髮生

陌上桑

秦樓日出光行攀陌上桑自言好夫壻千騎領
東方人夜催登箔終朝不掩筐南來停五馬春色
斷人腸

當壚曲

酒樓高插天斗酒價十千當壚有豔婦挾瑟理

鳴絃大堤笑留客河間工數錢春風吹歷亂買
醉百花前

吳趨變曲

入室徵三婦開門接小姑單衫著杏子雙慢結
茱萸夜色銷銀燭春心貯玉壺丈人且爲樂四
座唱吳趨

西南

赤白方傳羽西南未解圍金錢傾少府玉几重
宵衣斧鉞乘秋氣樓船下夕暉同時諸道出誰

奏凱先歸

其二

受招俱賜土占籍可勤耕汝輩蒙恩澤天王自
聖明豈令虛越地已命獲嘉城不測雷霆意無
懷蜂虿情

上將

上將稱無敵前軍變不虞雖償裹革志乃搆脫
巾呼肘腋方難御鯨鯢未可圖大同原作俑誰
爲請天誅

符卿李公伯承丞余郡免歸濮陽奉寄二
首

自佐謝公郡何論謫宦新更來鳴鶴日遂應解
龜辰近海滄波曙還家芳草春無勞猿鶴怨真
作北山人

其二

衆鳥敬亭散君歸先倦禽舊耽魯酒薄一臥岱
雲深日憶江南曲風回濮上音雖非顛顚者澤
畔自行吟

再入敬亭懷李白

李白祠前石誰留
弔古文名山真不厭
大雅竟難羣
棄置原從衆
飄零獨念君
青楓江上暮
一拜哭秋雲

讀山陰陳鳴野詩感舊

爾汝論交日
看君白髮侵
五言真破的一夕
併亡琴短杖煙霞積
遺編歲月深
縱今逢夜雪
無興到山陰

南都訪朱秉器比部

西省坐譚經西風客騎停城霜嚴玉漏掌露淨
金莖雨後花枝豔燈前竹葉青鍾山近官舍秋
色晚冥冥

登牛首投弘覺寺

秋深尋古寺日暮聞疎鐘宿霧千盤磴驚濤四
壁松塔光通靜室江氣上遙峰知是宸游地
雲成五色龍

金陵留別朱比部

謁來簪紱客獨有薜蘿情去路經霜合離心對

月明片帆隨鴈度孤劒作龍鳴歸到昭亭日懷
人叢桂生

渡江

南人初北渡同侶問前程江怒秋濤壯沙平夜
雪明樹分京口驛雲送石頭城擊楫自茲去中
流無限情

眞州

北程遵水國帆落是眞州雨色滄江暮潮聲大
海秋方言徵估客地勢控咽喉舊憶淮南賦將

因桂樹留

在野

在野近物性薄言驅短轅晴沙銜遠浦秋日滿
高原徑夕牛羊下林寒鳥雀喧於陵吾忝竊百
畝傍家園

早春同袁汝鳴沈君典侍家大人汎城東
遠水明芳甸凌春一蕩舟古今留勝蹟觴詠屬
清游山翠驕晴照潭煙澹夕流脩然來往意轉
覺近滄洲

白嶽太微院齋夜

鳴磬收殘照焚香坐太微玉臺天闕近金殿夜
光圍冲默凝玄貺希夷寤道機珊珊來羽節遙
見五雲飛

新安尋程子虛村居

孤村近寒食風雨此招尋袖裏三年字尊前一
片心它山芳草暮臨水綠楊陰會有思歸曲因
風入素琴

落石臺劉丞子敦席賦

相見但尊酒重來猶布衣宦情君自薄世故我
多違日落溪陰肅春歸花事稀好將一片石分
作老漁磯

時父叔子綦景靈兄賦得還字見訊奉答
兩腋挾風還依然獨閉關空亭合芳草短杖挂
青山瓊樹遙縣夢金芝擬駐顏賦成君勿訝來
不自人間

春日訪汪中丞廷德中丞初卜居宣城

敬亭流寓處花樹尚成村別後懷魚素依然隱

鹿門重逢芳歲改垂問故交存日暮鶯啼罷玄
言命一尊

秋夜

攬鏡不成照開尊亦彊驩高梧鳴夜雨孤榻動
秋寒玩世曾何敢希知偶自安莫輕江海事容
易說漁竿

中秋侍家大人看月

明月中天迴馮軒坐共看秋聲千杵急夜色萬
家寒北海尊初滿南樓興未闌願持靈兔藥長

此奉清驩

過對亭庵

白蓮從有約每飯在東林隔竹茶煙起閉關花
雨深諸天迴夕照孤塔下春陰坐久鳴鐘罷悠
然靜者心

別汪仲嘉謝少廉程子虛

豈惜故人別其如知己稀當歌不成調對酒一
沾衣白眼情堪見青雲願久違行藏難自定轉
憶北山薇

送龍君揚使君不及寄之湖上

臨岐空有淚不及灑君衣獨鳥向空沒孤帆入
雨微王程芳草緩物候落花稀還念蠓江勝因
之覓釣磯

其二

憶醉分宵月曾揮解慍風酒人堪代霸詞客敢
爭雄逸興飛雲上離覓細雨中浮生難自料真
好比飄蓬

觀復樓夜飲同湯義少

竭來河朔會共是高陽兒雨怒天無賴宵寒暑
失期濁醪從所好短燭問何其且緩駢駢唱離
心不自持

同義少登開元寺塔

蕭颺寒颺舉熹微海日升諸天秋自淨孤塔客
同登笑語從空落青蔥向曉凝法輪應不滅長
護石蓮燈

其二

地開金粟色塔散玉毫光萬籟乘吹迴孤雲引

眺長中天叅混沌別界俯蒼茫將欲凌風去
翩一羽翔

龍溪別龍郡丞身之湯孝廉義少

酒闌千嶂夕帆挂一谿陰此地把君手浮雲傷
客心中年多別恨末俗少知音爲緩須臾發依
依聽醉吟

早夏送湯義少北上

西來春水壯北望夏雲新抱策干明主題詩
送遠人斷蓬一失所芳草獨傷神以我尊前淚

灑君車上塵

秋夜侍家大夫同貢東平沈君典宴陳使
君高齋時修郡乘卒業

論文因下榻攜手自中林每以簿書候兼之山
水音一星南斗避片月北樓陰在坐看黃髮居
然憲老心

其二

留客深投轄分曹促覆卮清宵更燭跋涼露綴
罍恩地迴歌鐘肅風微刻漏遲亦知寬禮數沉

醉復何辭

其三

狂簡聊吾黨風流自使君
郡齋堪坐嘯賓客總能文
疊嶂標清漢雙江帶白雲
城東千載地時下鳳皇羣

其四

按圖曾會禹掌故向稱秦世濟
慚司馬書成感獲麟
股肱三輔重日月一編新
良史推陳壽江東蹟未湮

將有南中之役龍使君約會采石

何意秣陵遊先懷太白樓蛾眉雙鏡曉牛渚片
帆秋芳草經時歇青楓弔古愁大江堪釀酒十
日爲君留

夜筵示客

庭敞看星聚簾疎遞月微流光雙鳥過靜夜一
螢飛杯酒無今古冠簪有是非向傳山水調不
惜爲君揮

月夜自采石渡江

天豁大江流乘宵擊楫遊濤聲喧萬馬石影動
雙虬疊鼓疎星曉長歌片月秋余將問海若指
點一浮漚

下第南還逢家弟寄陳子野明府

子野有鳳泉茶

所

一鴈浩南征江寒片月明高秋游子淚遠道故
人情冰雪爭殘歲風煙接上京相期共茗椀吾
愛鳳泉清

奉答太常許公仲貽

歲晚故人疎
天寒戀敝廬
羈棲羨飛鳥
相憶見烹魚
木落江流細
梁空月色虛
向知饒勝具
登陟近何如

春日蒲上奉家大夫作

希知能貴我
散跡不關人
藜杖青山暮
綸巾白髮春
閒雲孤可托
小築四無鄰
行樂宜今日
鶯花事事新

其二

玄霧看藏豹
清風遡飲牛
人從輕楚服
儂自得

吳謳轉覺乾坤大能空今古愁白雲親舍近不敢賦長游

柏枧對酒憶瞿硎先生被鹿裘隱處

竹樹何蕭森春深古殿陰鳴泉漱幽石落日澹
塵襟地僻煙霞護山迴鐘磬沉頽然吾欲醉破
戒入東林

其二

空林每獨往濁酒遂相親虹截千峯雨鳥鳴三
月春流雲響蒼木涼吹起青蘋洞口桃花暮踰

踟躕憶隱淪

贈余廣文先輩

舉世悠悠者斯人可具論
一官聊振鐸十翼舊專門
隱矣文焉用條然道益尊
古來稱憲老薄俗自堪敦

海陽弔陳仲魚

脫劍不忘故片心當與俱
斯文留後死吾道失先驅
落日新丘壠浮雲舊酒壚
漢庭遣中使禪草尚存無

新都謁左司馬汪公奉贈四首

樓船曾出海斧鉞歟臨邊神武馮天授精忠並
日縣羽林環北極帝幄寄中權吉甫堪爲憲
清風頌可傳

其二

斑衣趨子舍祖帳滿都門湛露承三命高年
介上尊江河流不廢家國道俱存誰謂文章士
虛名一代尊

其三

方外新司馬廬中舊卧龍安危身自寄湖海我
將從掩閣玄心靜臨關紫氣重天都高不極藏
草更何峰

其四

久約來荀里今看御李君價因增白壁名敢附
青雲酒好令人遠言成定衆紛起居三致祝天
未喪斯文

黃山眺天都峰

天都一以眺菡萏半浮空勢拔諸峰秀名標大

地雄嵐光朝夕變雲氣古今同遙把浮丘袂冷
然欲御風

寄君典太史

已幸故人貴誰云古意微鳴珂趨玉署簪筆侍
彤闈出處關吾道江湖有釣磯何由乘一葉遙
向帝城飛

西城贈陸化伯

竭來城市裏亦有灌園人蓬戶貧非病花源隱
是真浮名逃綠酒長嘯岸烏巾澤畔吟雖苦何

關學楚臣

七夕江上

令節雙星夕微波片雨涼
蒼然木葉下秋色滿瀟湘
瓜果仍遺俗蒹葭自一方
南飛烏鵲盡河漢欲成梁

寄吉州劉師司理

十年一書札但有長相思
黑髮清朝隱斑衣聖主私
楚雲秋色遠江草露華滋
九辯無勞續行藏信所之

雨後月出獨酌

良夜非耽飲清輝自可憐
浮雲聊點綴列宿讓
精妍羣籟傳虛牝靈根見太玄
脩然長嘯發鸞
翻共蹁躑

送徐少府赴蜀

草歇三秋浦蓬飄萬里身
登天攀蜀道歌雪失
巴人黃綬稱仙尉斑衣念老親
遙知趨府日花
滿錦城春

重送徐少府

巴江流不盡兩岸夜猿聲秋盛黃牛峽天高白
帝城南雲頻引望西極自孤征漢道中興日功
曹未可輕

仲父黃渡別墅

知非陶令宅五柳向人垂池淨魚縣鏡庭閒鳥
近帷丹崖秋色迴白日醉鄉遲坐對蕭蕭竹風
流良在茲

同允甫叔夜坐

燈殘分聽雨地迴易驚秋積思如芳草浮生但

敝裘虎頭吾已愧
龜手爾何投
不寐發深省
寒泉徹夜流

晏坐

晏坐寂無隣
寒鐙照影親
鳶肩非易得
龍性竟難馴
萬事堪醇酒
浮生笑角巾
向誰披豁好
吾自識吾真

廷承子登北還

愁經燕地雪歸及
敬亭春詎意當茲日
依然慨不辰
雨中花片盡
鏡裏二毛新
佩有雙鉤在
時

時爲拂塵

答張吉甫見寄

看雲懷舊約流水度愁心迴棹霜江晚開函霞
氣深青山期共往白雪易孤吟握手知何日還
當醉墮簪

對竹憶陳子野明府子野有邀遂閣

以君能寫竹見竹自思君猶念青溪上曾邀短
遂聞午香深遞雨寒影暗搖雲空有王猷興行
吟到日曛

別近溪羅使君晚歸

別君猶繾綣歸路任盤桓樹白生煙暝山青落日寒
亂流爭渡急奔壑齧雲殘一片春江月愁分夢裏看

王仲房見過輒有投別和答

弭楫雙谿上高城俯夏雲登樓曾寄賦倒屣乍逢君
契分誰堪託材名老不羣河梁卽今日把酒易成醺

春月大人命賦

誰謂春宵月難同
瓊漢明光涵珠澤
媚影落玉關
清林午蒼虬偃枝寒
翠羽驚莫將團扇詠
猶未露盈盈

溪上晚步

涼風吹白幘
顧影長高情
向夕山逾碧
臨流竹更清
斷雲潛壑媚
歸鳥遡霞明
溪曲公回罷
聞歌夜散耕

醉後過郊外問梅

風日興淒清
衝寒仗酒兵
入山逢雪早
踐石覺

雲生木落溪流細
天高鴈字橫
梅花消息近
吾汝舊爲盟

月夜飲郭汝堅有述

蘭尊遲半魄
松影漏斜輝
涼夜把君手
微風吹客衣
荷鋤存古道
抱甕息閒機
我豈馳驅老
終期共採薇

寄劉子肖先輩敬亭莊

敬亭山自好
落日起孤雲
望望情無極
遙遙夢不分
餘光天際度
清吹夜深聞
剩有長林興
看

君作鹿羣

得汪仲淹書

經年千里別三月一書來病骨知無恙雄心覺
未摧雲停頻倚杖天遠獨登臺草色池塘暮還
憐謝客才

送憲上人還淮北所居

寒江千里暮送爾渡杯還已識秋雲幻猶依淮
水間臘高霜樹老禪寂雨花閒不學支公隱逢
人問買山

臨川湯義少以姜明府迎至

相思傳尺鯉遠道借雙鳧花樹河陽滿煙霞壘
嶂孤歌將琴調合酒破俸錢酤况有昭亭色高
樓日與俱

寄子登吳廷丞

煙嵐迷枕席風雨偃柴荆卧病三秋色懷人一
水情張燈蟲語集落木鴈書征倘共南樓興胡
牀坐月明

子登席上同湯義少

留賓逢地主佐酒出天人誰信非吾土相看盡
客身尊前巫峽雨花外敬亭春莫倚狂能賦風
塵白眼新

過鴻臚叔

秋懷不自好落日欵柴關徑曲全依水林疎易
得山世人歸白眼僊術駐丹顏三弄拂衣去餘
音杳靄間

君典別赴金陵即晚有懷

慣作上都游長江日夜流殘霞收雨脚片月出

雲頭未擬孤舟遠已驚雙鬢秋與君自難別非
惜敝貂裘

重五夜飲良輔伯家

螢光穿曲檻蟾影落虛池銀漢斜傾座金波細
溢卮歌殘紈扇掩燭散火雲移爲問今何夕芳
蒲手自持

東翟駕部玄妙觀

條經旬日雨遙隔萬重雲浪跡玄關客閒探玉
笈文城高風轉急夜靜漏初聞染翰知餘事驚

羣屬右軍

歲暮懷崔大伯溫塞外

落魄高陽侶，羈魂絕塞孤。
飛蓬寒逐馬，遶樹夜愁烏。
故國雲當眼，殘年雪滿顱。
日歸歸未得，清淚灑窮途。

讀李于鱗集二首

絕調工操雪，浮名近積薪。
文章元忌達，天地豈私貧。
五子堪齊轂，千秋讓斲輪。
到今華不注，紫氣望中新。

其二

偃蹇談天口迂疎玩世身衆言將折聖專巧欲
驚神秉羽登齊霸塞蘭問楚濱滄溟流不廢末
俗浩迷津

溪夜重集諸叔聽潘生歌

隔水重移席張燈一放歌晉賢游近竹洛女步
凌波不盡深杯興其如良夜何奉君千歲樂莫
惜鬢毛皤

寄答余生子翔

予嗟頻獻玉爾亦久懷珠有意沉冥者藏身飲
博徒十年遲後會尺素問窮途感慨高歌發涼
蟾照影孤

龍郡丞身之見枉不值輒投高詠次答

忽驚傳鳳吹猶媿隔龍門白眼看塵世青山避
衆喧感知頻攬劒和曲一鳴埵敢下高人榻空
回上客軒

座有歌者爲身之義少奪去却寄

燕辭先社日鶯轉別林春沅芷思公子巫雲夢

美人臨期曾解佩
隔座尚含嚔爲謝
看花客能忘漉酒巾

山中枉君典寄懽次荅

荒村含返照雲淨鴈初征
寒起飛泉色秋歸落木聲
瑟閒頻倚柱珠泣欲傾城
寂寞勞相問春風一夜生

軒居夜述

亦自甘沉陸誰當倚昔賢
羣聲秋閣上孤影夜燈前
雞肋年來意蛾眉世所憐
可堪叢菊發漫

爾識流年

立春前日是予誕辰諸兄弟期飲酒家

百年長覓醉一日卽逢春眷此連枝會况將芳草新不須金作勝自有玉爲人莫笑高歌者家徒四壁貧

江夜同貢惟肖

言期江郭夜呼酒一爲懽醉向孤舟卧星垂大澤寒風塵看折磬生計阻持竿不信雙谿水終慚七里灘

君典汝臣北上懷之

其柰別愁何相思北望歌黃昏深雨雪清夢遶
關河爾昔雙懷壁吾今獨撫柯長安花鳥地竝
馬逐游珂

龍身之席上觀戲龍舟

扶醉聽金縷迴颿蕩畫船中流清吹發落日片
帆前驤首凌雲迴飛空挾雨縣游龍驚欲賦恍
忽洛爲川

秋晚于湖署中酬龍使君

舉世多皮相惟君自目成暮雲孤榻下秋水片
心明貧病關何事文章豈著名將因今日會得
見古人情

其二

遊子何所適故人今在茲酒狂聊我輩經術乃
吾師雙燭夜堂靜孤筵秋戍遲將歸復臨水搖
落正堪悲

答沈君典

已覺山王貴猶存舊酒徒余方藏鼠璞君自剖

驪珠鏡裏朱顏失尊前白眼孤浮生何限事一
愧雄圖

雪中同鴻臚叔允甫叔得之姊丈侍大人
小集

漠圃憐消渴梁園思渺漫尊開山欲暝門掩席
逾寒夢蝶俱成幻餐鹽亦自安謝家小兒女能
作柳花看

侍大人宿仲父別墅

徑僻投車暝春深聞鳥喧清尊畱宴笑長被識

寒暄細雨嵐光澹穠花夜色繁白頭明燭裏相
與話田園

過王太學綜

四座放歌夜孤燈散帙秋江聲寒入郭雲色暝
依樓浮蟻俄蠲疾驚鳥數起愁片心難自見稍
稍向君投

湖南得歐楨伯博士書

落日湖南館清秋薊北書天長頻夢汝地迴獨
愁予字字神俱王絲絲鬢欲疎上林空有賦誰

爲薦相如

一星

一星橫正練茲物竟何祥不爲浮雲掩將凌明
月光安危原倚伏社稷自靈長 聖主齋居日
何人有阜囊

江上送從兄歸

攜手送將歸西風吹客衣飛鴻忽相背驚鵲欲
何依寒雨石帆重夕陽江路微羈心無遠近去
住總多違

家大夫問藥于湖中夜撥悶

宛上門頻倚湖南枕尚親寒江正蕭瑟秋氣轉
酸辛色望眉間起方難肘後真悠悠聊自度鬱
鬱竟誰陳

其二

服食經旬誤鬢毛一夜蒼何當還結朏稍爲緩
愁腸隱几眠何意篝燈坐忽忘偶深情至語寥
寂不成章

水西謁王文成公祠時 詔議廟祀未定

一代星初聚千秋文在茲名高扶日月世重擬
著龜靈象曾搜祕鴻濛爲破奇空陳涇水薦不
入孔林卮

其二

金鼓從天下龍蛇指日分人皆稱再造君自視
浮雲赤舄安狼尾單車散虎羣回思題柱夢真
兩伏波軍

偶成

避客尊前態憑闌世外心迴風能解醉積水自

成陰鷺影晴沙曲蟬吟夏木深地偏塵不到隨
興一披襟

二從弟過得深字

平疇分白水曲渚隱青林二妙能相過孤懷向
爾吟飛雲迷遠眺落日澹幽襟密邇瞿硎宅勞
勞悵轉深

簡張大來

所貴自希知浮名亦有時以君未得意於世轉
堪疑懷璧寧非罪紉蘭似可思行藏吾道在相

見且銜卮

夜讀汪子建扇頭詩有懷

猶憶初逢日秋生薜蘿林君能先結襪吾喜一
披襟山水元同調冰霜亦素心長懷團扇詠明
月敬亭陰

贈汝華內妾

綠衣憐昔詠黃額媚新妝秦鳳吹簫集湘蘭入
夢芳千花羞色豔雙黛寫眉長真到桃源路風
流是阮郎

再次

三星今在戶片月照迴妝敘溜初聞響燈殘暗
襲芳近譙驚夜短夢峽覺雲長不見王家婦高
標羨大郎

秋日吾與軒

閒臨谿水湄聊爾愜幽期地迴霜威早天長鴈
影遲晚楓遙妬酒秋閣一題詩自信浮生得悠
悠任所之

張五大來在坐懷王山人

相見作何狀黯然翻自疑以諧河朔會而憶剡
川期道在元非病身貧不廢詩高樓共徙倚橫
笛暮愁吹

子綦昆仲夜坐

地迴春流淨天清夕響沉連枝庭映紫玄鬢鏡
窺深短榻三宵夢高樓萬里心浮雲瞻北極今
古自陰陰

德純席作

陽春憐寡和子夜爲君留鷄黍經旬約梟盧倚

醉投片心孤對月爽氣颯疑秋披髮吾稱達相
依避暑流

仲春拜洪村祖壠

藏舟瞻夜壑濡露感春陰蘋藻慚殷薦松楸暗
折心龍文幽自照燕翼世能深素業青緗在遲
迴祖德吟

燕翼堂同諸兄弟酌

積雨銷繁暑深林駐晚涼張燈足幽興把酒醉
虛堂潢影依人近泉聲入座長不知今夜夢池

草可重芳

龍使君暫還姑孰迎監部以前間者彌月
待余至乃行率申短述

因君遙策騎遲我暫維舟但得片時語堪銷一
月愁物情方自貴雅意欲何求向說張廷尉高
名結襪收

鹿裘石室集卷第八

終